

中西醫解

成都尚古
堂印行



中西醫西解



南京中医药大学图书馆版

光緒己亥孟春
刻於四川成都



北京中医药大学图书馆版权所有

敘

夫守方隅之見者不能馳域外之觀而好高務廣者流又往往舍
近求遠趨新奇而廢正道如陳相師許行梁武尊佛氏不已俱乎
然果能擇善而從則又如趙武靈王易胡服習騎射遂霸天下蓋
窮變通久不拘於墟也方今四海爲家五洲同軌自鴻荒以至於
是天地開闢於斯爲盛舉凡三才之所有百族之所宜上可損益
乎古今下可參酌乎中外要使善無不備美無不臻駕三皇而軼
五帝豈獨一才一藝彰明較著於天下已耶夫醫其小焉者也然

卽以醫論又豈可以歧視哉同是人也同是心也西醫亦有所長
中醫豈無所短蓋西醫初出未盡周詳中醫沿訛率多差謬因集
靈素諸經兼中西之義解之不存疆域異同之見但求折衷歸於
一是冀五大洲萬國之民咸無夭札乃足盡仁民愛物之量夫醫
其小焉者也所望賢士大夫採風觀政棄短取長得推行盡利之
方建長治久安之策用以備

聖明之採納則誠盡美盡善矣醫其小焉者也時

光緒十八年壬辰九月彭縣唐宗海識於上海袖海山房

例言

一唐宋以後醫學多譎西法近出詳形迹而略氣化得粗遺精皆失也因集靈素諸經採其要語分篇詳註爲救其失起見非好辯也識者諒之

一每篇標題四字以別章節知非著述體裁然使學者先知綱目易於尋求不嫌有乖大雅也

一 是書註釋多由心得實皆以經解經毫無杜撰閒採西法或用舊說總求其是而已

一 是書期於實用與各種經古文詞不同故解義順詁無漢宋門戶之分亦無中西異同之見要使經旨皎然足裨實用爲有益於世耳

一 是書方證未能詳列然於審證處方之理業經發明則權衡在我無論中西各醫書皆有裁別不致迷眩是醫學正本清源之書也

一 是書所引內難經文未及其半然大義微言採註已備熟此後再讀全書自能渙然冰釋

中西醫解目錄

上卷

人身陰陽

五臟所生

五臟所屬

五臟所藏

五臟所主

臟腑所合

臟腑之官

五臟九竅

男女天癸

血氣化生

營衛生會

六經六氣

經氣主治

十二經脈

衝任督帶

下卷



北京中医药大学图书馆版权所有

全體總論

五臟所傷

五臟所惡

臟腑爲病

諸病所屬

四時所病

臟腑通治

望形察色

聞聲別證

問察原委

診脈精要

審治處方

氣味陰陽

性味宜忌

七方十劑



南京中医药大学图书馆版权所有

中西醫解上卷

彭縣唐宗海容川著

人身陰陽

西醫謂造化主惠育羣黎所謂造化主卽天地之神也與中國人本天地之中以生之義不謀而合但語言文字略不同耳茲且舉天地生人之理先注明之天地只此陰陽化生五運六氣人身秉此陰陽乃生五臟六腑

夫自古通天者生之本本於陰陽 凡人未生之前男女媾精而

成此胎孕卽本天地水火之氣而交媾也旣生之後鼻息呼吸
得天之陽以養氣飲食五味得天之陰以養血是未生之前旣
生之後皆無不與天相通而所以相通之故則以人身之陰陽
實本於天地之陰陽而已

陰者藏精而起亟也陽者衛外而爲固也 人身之陰陽互爲功
用陽無陰則亡陰無陽則脫陰主藏精於內而陰中之氣乃常
亟起以應乎外有如皮膚在外屬陽而在內之血液必達於皮
膚以爲毛爲汗氣出口鼻爲陽而在下之水津必出於孔竅以

爲津爲液此卽亟起應陽之一端也陽者陰之衛也有陽衛於外而陰乃固於中譬之女子之胎內有血衣是陰也其外先有水衣包之水衣包血衣此卽陽衛於外陰乃得固之義又如傷寒邪入皮毛繼乃傳經入裏蓋因陽不衛外是以陰不能固於其內此可見陰陽交互之理

言人之陰陽則外爲陽內爲陰言人身之陰陽則背爲陽腹爲陰言人身臟腑中陰陽則臟者爲陰腑者爲陽就人渾而論之則在外者皮肉筋骨皆屬陽在內者五臟六腑皆屬陰若就人身

分而論之則背象天覆爲陽督脈統之而太陽經全司之腹象
地載爲陰任脈統之而太陰經全司之再以臟腑分論之則五
臟主藏爲陰六腑主瀉爲陽夫外爲陽而有腹背之陰陽者陽
中有陰陽也內爲陰而有臟腑之陰陽者陰中有陰陽也人必
先明天地陰陽之理而後知人身之氣化

此節生氣通天論金匱真言論文合爲一章以爲醫理之
大源也

五臟所生

天有五氣地有五行人本天地之中以生而有五臟臟者藏也藏天地之精氣所以成其形而爲人也故欲知人身之陰陽須先知五臟之氣化

東方生風 東方於卦爲震於時爲春陽氣發動而陰應之遂生風氣風氣者乃天春生無形之氣也

風生木 由無形之五氣生有形之五行春氣所生爲甲乙木蓋在天則木本風化而在人則肝爲風臟

木生酸 有木之形卽有性味木之味酸



酸生肝 五氣五行亦既朕兆而成性味矣然後人得秉之而生

五臟秉風木之氣所生則爲肝臟焉

南方生熱 南方正當赤道於卦爲離陽氣外發是生熱氣

熱生火 熱者夏之令也夏氣所生於地之五行爲丙丁火

火生苦 凡物經火味無不苦蓋火之性使然也

火生心 生人秉火之性味於是而生心臟

中央生溼 中央陰陽交會之所陰屬水陽屬火水火交會而生

溼氣爲長夏之令以化生萬物



溼生土 溼氣無形化生有形爲戊己土土之生物全在於中含
溼氣也

土生甘 土之味本淡而所生五穀則味甘故甘者土之性味也
甘生脾 人秉土之性味於是而生脾臟

西方生燥 西方主秋金之氣收斂肅殺其氣爲燥

燥生金 有此無形之燥氣乃生有形之金於地之五行爲庚辛

金

金生辛 有燥金之氣性然後生此辛味

辛生肺 人秉金之性味於是而生肺臟所以藏天地之金氣也

北方生寒 北方主冬令生寒氣

寒生水 氣以生形寒氣所生爲壬癸水

水生鹹 寒水之性其味爲鹹

鹹生腎 人生秉寒水之性味而生腎臟以司人周身之水

人生本天地故生此五臟以應天地之陰陽必先知人之
五臟本於五行然後發之爲百骸推之爲萬物莫不本於
五行焉五行之氣偏則爲病草木各得五行之氣借以調

